



ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՈՒՐԴ

ք. Երևան

27.02.2017թ.

Ո Ր Ո Շ ՈՒ Մ

ՀՀ գնումների բողոքարկման խորհրդի

թիվ ՍՑ-96/16

ՀՀ գնումների բողոքարկման խորհրդի (այսուհետ նաև՝ Խորհուրդ) բողոքը քննող հանձնաժողովը՝ գործելով Խորհրդի անունից, քննելով ՀՀ ֆինանսների նախարարության 06.08.2015թ. թիվ 1/73-1/20983-15 և 01.02.2016թ. թիվ 1/73-1/2979-16 գրություններով ներկայացված «Ոսկե Դելֆին» ՍՊԸ-ին (այսուհետ նաև՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու պաշտոնական ընթացակարգով նախաձեռնված բողոքը (այսուհետ նաև՝ ՍՑ-ԳԲԽ-96/16 բողոք), ինչպես նաև ուսումնասիրելով ՍՑ-ԳԲԽ-96/16 բողոքի վերաբերյալ «Գնումների աջակցման կենտրոն» ՊՈԱԿ-ի (այսուհետ նաև՝ Կենտրոն) 09.02.2017թ. ներկայացրած եզրակացությունը, պարզեց հետևյալը.

1. ՀՀ ֆինանսների նախարարության ներկայացրած փաստերը և պահանջը

ՀՀ ֆինանսների նախարարությունը, «Երեխայի զարգացման կենտրոն» ՊՈԱԿ-ի 05.08.2015թ. թիվ 396 և ՀՀ առողջապահության նախարարության 18.08.2015թ. թիվ ԱԿ/9603-15 գրությունների հիման, 06.08.2015թ. թիվ 1/73-1/20983-15 և 01.02.2016թ. թիվ

1/73-1/2979-16 գրություններով դիմել է «Գնումների աջակցման կենտրոն» ՊՈԱԿ-ին (այսուհետ՝ Կենտրոն)՝ խնդրելով ուսումնասիրել «Ոսկե Դելֆին» ՍՊԸ -ին գնումների գործընթացին մասնակցելու իրավունք չունեցող մասնակիցների ցուցակում (այսուհետ՝ Ցուցակ) ներառելու հիմքերը և այդպիսի հիմքերի առկայության դեպքում ձեռնարկել անհրաժեշտ միջոցներ Ընկերությանը Ցուցակում ներառելու համար:

2. «Ոսկե Դելֆին» ՍՊԸ-ի ներկայացրած փաստարկները և դիրքորոշումը

«Գնումների աջակցման կենտրոն» ՊՈԱԿ-ը կարծիք ստանալու նպատակով 27.10.2015թ. թիվ 01/04.1/2981-15 և 05.02.2016թ. թիվ 01/04.1/313-16 գրություններով դիմել է «Ոսկե Դելֆին» ՍՊԸ-ին:

Ի պատասխան Կենտրոնի վերը նշված գրությունների՝ Ընկերության կողմից կարծիք չի ներկայացվել:

«Ոսկե Դելֆին» ՍՊԸ-ն, պատշաճ ծանուցված լինելով 12.12.2016թ. ժամը 15:30-ին Կենտրոնում կայացած ՍՑ-ԳԲԽ-96/16 բողոքը քննող հանձնաժողովի նիստի վերաբերյալ, չի ապահովել իր ներկայացուցչի մասնակցությունը:

3. «Երեխայի զարգացման կենտրոն» ՊՈԱԿ-ի կողմից ներկայացրած փաստարկները և դիրքորոշումը

«Երեխայի զարգացման կենտրոն» ՊՈԱԿ-ը (այսուհետ նաև՝ Պատվիրատու) 05.08.2015թ. թիվ 396 գրությամբ հայտնել է, որ «Ոսկե Դելֆին» ՍՊԸ-ն ներկայացրել է կեղծ տվյալ հայտի թիվ 3.4 հավելվածով. այն է, Ընկերությունը հայտնել և հավաստել է, որ հայտը ներկայացնելուն նախորդող՝

ա. երեք հաշվետու տարիների համախառն եկամտի հանրագումարը պակաս է ներկայացված գնային առաջարկից.

բ. հաշվետու տարվա ընթացքում պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը:

Մինչդեռ հարցման արդյունքում պարզվել է, որ նշված հայտարարությունը իրականությանը չի համապատասխանում:

Պատվիրատու 1-ը, պատշաճ ծանուցված լինելով, 12.12.2016թ. ժամը 15:30-ին Կենտրոնում կայացած ՍՑ-ԳԲԽ-96/16 բողոքը քննող հանձնաժողովի նիստի վերաբերյալ, չի ապահովել իր ներկայացուցչի մասնակցությունը:

4. ՀՀ առողջապահության նախարարության կողմից ներկայացրած փաստարկները և դիրքորոշումը

ՀՀ առողջապահության նախարարությունը 18.08.2015թ. թիվ ԱԿ/9603-15 գրությամբ հայտնել է, որ «Գնումների գործընթացի կազմակերպման» կարգի (այսուհետև՝ Կարգ) 47-րդ կետի 1-ին ենթակետով նախատեսված հարցման վերաբերյալ ՀՀ ԱՆ «Հիվանդությունների վերահսկման և կանխարգելման ազգային կենտրոն» ՊՈԱԿ-ը ստացել է եզրակացություն (այսուհետև՝ Պատվիրատու 2), համաձայն որի «Ոսկե Դելֆին» ՍՊԸ-ն «ՇՀԱՊՁԲ-15/10-ՀՎԿԱԿ-2015-20» ծածկագրով մրցույթի հայտը ներկայացնելու օրվա դրությամբ ՀՀ պետական բյուջեի նկատմամբ ունի ժամկետանց հարկային պարտավորություններ:

Պատվիրատու 2-ը, պատշաճ ծանուցված լինելով 12.12.2016թ. ժամը 15:30-ին Կենտրոնում կայացած ՍՑ-ԳԲԽ-96/16 բողոքը քննող հանձնաժողովի նիստի վերաբերյալ, չի ապահովել իր ներկայացուցչի մասնակցությունը:

5. ՍՑ-ԳԲԽ-96/16 բողոքի վերաբերյալ «Գնումների աջակցման կենտրոն» ՊՈԱԿ-ի դիրքորոշումը

«Գնումների աջակցման կենտրոն» ՊՈԱԿ-ը Խորհրդին է ներկայացրել իր 09.02.2017թ. եզրակացությունը և առաջարկել ՀՀ ֆինանսների նախարարության 06.08.2015թ. թիվ 1/73-1/20983-15 և 01.02.2016թ. թիվ 1/73-1/2979-16 գրություններով ներկայացված «Ոսկե Դելֆին» ՍՊԸ-ին (ՀՎՀՀ՝ 00466473) ներառել գնումների գործըն-

թացին մասնակցելու իրավունք չունեցող մասնակիցների ցուցակում՝ ՀՀ գնումների բողոքարկման խորհրդի որոշումը կայացվելու օրվանից հաշված վեց ամիս ժամկետով:

6. ՍՑ-ԳԲԽ-96/16 պաշտոնական ընթացակարգով նախաձեռնած բողոքի քննության համար էական նշանակություն ունեցող փաստերը

ՀՀ ֆինանսների նախարարության 06.08.2015թ. թիվ 1/73-1/20983-15 և 01.02.2016թ. թիվ 1/73-1/2979-16 գրություններով ներկայացված «Ոսկե Դելֆին» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու պաշտոնական ընթացակարգով նախաձեռնած բողոքի քննության համար էական նշանակություն ունեն հետևյալ փաստերը՝

1. «Երեխայի զարգացման կենտրոն» ՊՈԱԿ-ի կողմից կազմակերպված «ՀՀ ԿԱ Ռ-ՇՀԱՊՁԲ-15/2-Ս/2015/ՄԱՆԿ-3» ծածկագրով ընթացակարգ

1. «Երեխայի զարգացման կենտրոն» ՊՈԱԿ-ի կողմից կազմակերպված «ՀՀ ԿԱ Ռ-ՇՀԱՊՁԲ-15/2-Ս/2015/ՄԱՆԿ-3» ծածկագրով ընթացակարգին մասնակցելու նպատակով «Ոսկե Դելֆին» ՍՊԸ-ն **30.06.2015թ.** հայտ է ներկայացրել:

2. Ընկերությունը հայտի N 3.4 հավելվածով՝ ֆինանսական միջոցների մասին հայտարարությամբ հայտնել և հավաստել է, որ **հայտը ներկայացնելուն նախորդող երեք հաշվետու տարիների համախառն եկամտի հանրագումարը պակաս չէ ներկայացված գնային առաջարկից:**

3. Ընկերությունը հայտի թիվ 4 հավելվածով ներկայացրել է գնային առաջարկ, թվով 32 չափաբաժինների մասով, որից առավելագույնը ներկայացվել է 1-ին չափաբաժնի համար և դրա գինը կազմել է **1 559 520 ՀՀ դրամ:**

4. Պատվիրատու 1-ը, ՀՀ ֆինանսների նախարարությանն ուղղված ՀՀ կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի 47-րդ կետի 1-ին ենթակետով նախատեսված տվյալների ճշտման

մասին 17.07.2015թ. կատարված հարցմամբ, խնդրել է տրամադրել տեղեկատվություն «Ոսկե Դելֆին» ՍՊԸ-ի վերաբերյալ:

5. Ի պատասխան վերը նշված հարցմանը՝ ՀՀ ֆինանսների նախարարության կողմից Պատվիրատու 1-ին 25.07.2015թ. տրամադրվել է եզրակացություն, համաձայն որի «Ոսկե Դելֆին» ՍՊԸ-ի **հայրը ներկայացնելուն նախորդող երեք հաշվետու տարիների համախառն եկամրի հանրագումարը գրոյական է:**

2. **«Հիվանդությունների վերահսկման և կանխարգելման ազգային կենտրոն»**

ՊՈԱԿ-ի կողմից կազմակերպված «ՇՀԱՊԶԲ-15/10-ՀՎԿԱԿ-2015-20»

ծածկագրով ընթացակարգ

1. «Հիվանդությունների վերահսկման և կանխարգելման ազգային կենտրոն» ՊՈԱԿ-ի կարիքների համար կազմակերպված «ՇՀԱՊԶԲ-15/10-ՀՎԿԱԿ-2015-20» ծածկագրով շրջանակային համաձայնագրերի միջոցով գնում կատարելու ընթացակարգին մասնակցելու նպատակով «Ոսկե Դելֆին» ՍՊԸ-ն **07.08.2015թ.** հայտ է ներկայացրել:

2. Ընկերությունը հայտի թիվ 2 հավելվածով՝ Ընթացակարգին մասնակցելու նպատակով հրավերով սահմանված մասնակցության իրավունքի պահանջներին իր տվյալների համապատասխանության մասին հայտարարությամբ, հայտնել և հավաստել է, որ **հայրը ներկայացվելու օրվա դրությամբ չունի ժամկետանց հարկային պարտքեր Հայաստանի Հանրապետության հարկային և պարտադիր սոցիալական ապահովության վճարների գծով:**

3. Պատվիրատու 2-ը, ՀՀ ֆինանսների նախարարությանն ուղղված Կարգի 47-րդ կետի 1-ին ենթակետով նախատեսված տվյալների ճշտման մասին 10.08.2015թ. կատարված հարցմամբ, խնդրել է տրամադրել տեղեկատվություն «Ոսկե Դելֆին» ՍՊԸ-ի վերաբերյալ:

4. Ի պատասխան վերը նշված հարցմանը՝ ՀՀ ֆինանսների նախարարության կողմից Պատվիրատու 2-ին 14.08.2015թ. տրամադրվել է եզրակացություն, համաձայն որի «Ոսկե Դելֆին» ՍՊԸ-ն **հայրը ներկայացնելու օրվա դրությամբ ՀՀ պետական բյուջեի նկատմամբ ունի ժամկետանց հարկային պարտավորություն 359 ՀՀ դրամի չափով:**

5. Ընթացակարգի գնահատող հանձնաժողովը 13.08.2015թ. ժամը 10:00-ին կայացած նիստի թիվ 3 արձանագրությամբ որոշել է «Ոսկե Դելֆին» ՍՊԸ-ի հայտը մերժել:

7. Խորհրդի հիմնավորումները և եզրահանգումը

Խորհուրդն, ուսումնասիրելով «Երեխայի զարգացման կենտրոն» ՊՈԱԿ-ի 05.08.2015թ. թիվ 396 և ՀՀ առողջապահության նախարարության 18.08.2015թ. թիվ ԱԿ/9603-15 գրությունները և կից փաստաթղթերը հայտնում է հետևյալը.

1. «Երեխայի զարգացման կենտրոն» ՊՈԱԿ-ի կողմից կազմակերպված «ՀՀ ԿԱ ՈՇՀԱՊՁԲ-15/2-Ս/2015/ՄԱՆԿ-3» ծածկագրով ընթացակարգ

«Գնումների մասին» ՀՀ օրենքի 5-րդ հոդվածի 3-րդ մասի 4-րդ կետի համաձայն՝ մասնակիցը պետք է բավարարի հրավերով սահմանված որակավորման չափանիշներին: Մասնակիցը պետք է ունենա պայմանագրով նախատեսված պարտավորությունների կատարման համար հրավերով պահանջվող ֆինանսական միջոցներ:

Օրենքի 5-րդ հոդվածի 1-ին մասի 4-րդ կետի «բ» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե հայտը ներկայացնելու պահին նախորդող տարվա ընթացքում գնման գործընթացի շրջանակում ներկայացրել է կեղծ տվյալ:

Օրենքի 48-րդ հոդվածի 6-րդ մասի 7-րդ կետի համաձայն՝ ՀՀ գնումների բողոքարկման խորհուրդն իրավունք ունի որոշում կայացնելու մասնակցին գնումների գործընթացին մասնակցության իրավունք չունեցող մասնակիցների ցուցակում ներառելու համար:

ՀՀ կառավարության 10.02.2011թ. N 168-Ն որոշմամբ հաստատված «Գնումների գործընթացի կազմակերպման» կարգի Կարգի 67-րդ կետի 1-ին ենթակետի «ա» պարբերության համաձայն՝ մասնակիցների՝ Օրենքի 5-րդ հոդվածի 3-րդ մասի 4-րդ կետով նախատեսված՝ «Ֆինանսական միջոցներ» չափանիշը գնահատվում է հետևյալ կարգով՝

1) հրավերով պահանջվում է, որ Հայաստանի Հանրապետության ռեզիդենտ հանդիսացող մասնակիցն իր հայտով ներկայացնում է հայտարարություն այն մասին, որ իր կողմից **հայտը ներկայացվելուն նախորդող՝**

ա. երեք հաշվետու տարիների համախառն եկամտի հանրագումարը պակաս է ներկայացված գնային առաջարկից.

Կարգի 47-րդ կետի 1-ին ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարն էլեկտրոնային եղանակով Հայաստանի Հանրապետության ֆինանսների նախարարություն՝ (հղումը կատարված է մինչև ՀՀ կառավարության 07.07.2016թ. N 700-Ն որոշումը ուժի մեջ մտնելը) հարցում է ներկայացնում առաջին և հաջորդաբար տեղ զբաղեցրած մասնակիցների՝ Հայաստանի Հանրապետության պետական բյուջեի նկատմամբ հայտը ներկայացնելու օրվա դրությամբ ժամկետանց հարկային պարտավորությունների, ինչպես նաև նույն կարգի 67-րդ կետով նախատեսված որակավորման պահանջի առկայության վերաբերյալ՝ ներկայացնելով հարկ վճարողի հաշվառման համարը:

Կարգի 48-րդ կետի համաձայն՝ Հայաստանի Հանրապետության ֆինանսների նախարարությունը նույն կարգի 47-րդ կետի 1-ին ենթակետով նախատեսված հարցումն ստանալու օրվան հաջորդող երկու աշխատանքային օրվա ընթացքում էլեկտրոնային եղանակով պատվիրատուին տրամադրում է հարցման մասին եզրակացություն: Նույն կետով սահմանված ժամկետում Հայաստանի Հանրապետության ֆինանսների նախարարությունից եզրակացության չստացման դեպքում մասնակցի ներկայացրած հայտարարությունը համարվում է իրականությանը համապատասխանող: Եթե տրամադրված եզրակացության արդյունքում մասնակցի ներկայացրած հայտարարությունները որակվում են իրականությանը չհամապատասխանող, ապա՝

1) հայտերի գնահատման արդյունքների հրապարակման նիստում հանձնաժողովի որոշմամբ տվյալ մասնակցի հայտը մերժվում է, և

2) այդ մասնակցի տվյալները գնման գործընթացին մասնակցելու իրավունք չունեցող մասնակիցների ցուցակում ներառելու գործընթաց նախաձեռնելու նպատակով հայտ եկած հանգամանքների մասին տեղեկությունները պատվիրատուի կողմից

ուղարկվում են Հայաստանի Հանրապետության ֆինանսների նախարարություն՝ դրանց ի հայտ գալու օրվան հաջորդող երեք աշխատանքային օրվա ընթացքում:

«Ոսկե Դելֆին» ՍՊԸ-ն «Երեխայի զարգացման կենտրոն» ՊՈԱԿ-ի կողմից կազմակերպված «ՀՀ ԿԱ Ռ-ՇՀԱՊՁԲ-15/2-Ս/2015/ՄԱՆԿ-3» ծածկագրով ընթացակար-գին մասնակցելու նպատակով **30.06.2015թ.** ներկայացված հայտի թիվ 4 հավելվածով ներկայացրել է գնային առաջարկ թվով 32 չափաբաժինների մասով, որից առավելագույնը ներկայացվել է 1-ին չափաբաժնի համար և դրա գինը կազմել է **1 559 520 ՀՀ դրամ:**

Ընկերությունը հայտի թիվ 3.4 հավելվածով՝ ֆինանսական միջոցների մասին հայտարարությամբ հայտնել և հավաստել է, որ **հայտը ներկայացնելուն նախորդող երեք հաշվետու տարիների համախառն եկամտի հանրագումարը պակաս չէ ներկայացված գնային առաջարկից**, մինչդեռ ՀՀ ֆինանսների նախարարության կողմից Պատվիրատու 1-ին 17.07.2015թ. տրամադրված եզրակացության համաձայն՝ Ընկերության հայտը ներկայացնելուն նախորդող երեք հաշվետու տարիների համախառն եկամտի հանրագումարը գրոյական է:

Խորհուրդն արձանագրում է, որ «Ոսկե Դելֆին» ՍՊԸ-ի կողմից «Երեխայի զարգացման կենտրոն» ՊՈԱԿ-ի կողմից կազմակերպված «ՀՀ ԿԱ Ռ-ՇՀԱՊՁԲ-15/2-Ս/2015/ՄԱՆԿ-3» ծածկագրով ընթացակարգի շրջանակներում 30.06.2015թ. ներկայացված հայտի թիվ 3.4 հավելվածով ներկայացված հայտարարությունը հանդիսանում է «Գնումների մասին» ՀՀ օրենքի 5-րդ հոդվածի 1-ին մասի 4-րդ կետի «բ» ենթակետով նախատեսված գնման գործընթացի շրջանակում կեղծ տվյալի ներկայացում, քանի որ Ընկերությունը նշված հայտարարությամբ հայտնել և հավաստել է, որ հայտը ներկայացնելուն նախորդող երեք հաշվետու տարիների համախառն եկամտի հանրագումարը պակաս չէ գնային առաջարկից, մինչդեռ ՀՀ ֆինանսների նախարարության կողմից տրամադրված եզրակացության համաձայն՝ Ընկերության հայտը ներկայացնելուն նախորդող երեք հաշվետու տարիների համախառն եկամտի հանրագումարը գրոյական է եղել:

2. **«Հիվանդությունների վերահսկման և կանխարգելման ազգային կենտրոն»**

ՊՈԱԿ-ի կողմից կազմակերպված «ՇՀԱՊՁԲ-15/10-ՀՎԿԱԿ-2015-20»

ծածկագրով ընթացակարգ

«Գնումների մասին» ՀՀ օրենքի 5-րդ հոդվածի 1-ին մասի 2-րդ կետի համաձայն՝ գնումների ընթացակարգերին մասնակցելու իրավունք չունեն անձինք, որոնք ունեն ժամկետանց պարտքեր Հայաստանի Հանրապետության հարկային և պարտադիր սոցիալական ապահովության վճարների գծով:

«Ոսկե Դելֆին» ՍՊԸ-ն «Հիվանդությունների վերահսկման և կանխարգելման ազգային կենտրոն» ՊՈԱԿ-ի կողմից կազմակերպված «ՇՀԱՊՁԲ-15/10-ՀՎԿԱԿ-2015-20» ծածկագրով շրջանակային համաձայնագրերի միջոցով գնում կատարելու ընթացակարգի մասնակցության **07.08.2015թ.** հայտի թիվ 2 հավելվածով՝ ընթացակարգին մասնակցելու նպատակով հրավերով սահմանված մասնակցության իրավունքի պահանջներին իր տվյալների համապատասխանության մասին հայտարարությամբ, հայտնել և հավաստել է, որ **հայրը ներկայացվելու օրվա դրությամբ չունի ժամկետանց հարկային պարտքեր Հայաստանի Հանրապետության հարկային և պարտադիր սոցիալական ապահովության վճարների գծով**, մինչդեռ ՀՀ ֆինանսների նախարարության կողմից 14.08.2015թ. տրամադրված եզրակացության համաձայն՝ **Ընկերությունը հայրը ներկայացնելու օրվա (07.08.2015թ.) դրությամբ ՀՀ պետական բյուջեի նկատմամբ ունեցել է ժամկետանց հարկային պարտավորություն 359 ՀՀ դրամի չափով**: Հետևաբար Խորհուրդն արձանագրում է, որ «Ոսկե Դելֆին» ՍՊԸ-ի կողմից «Հիվանդությունների վերահսկման և կանխարգելման ազգային կենտրոն» ՊՈԱԿ-ի կողմից կազմակերպված «ՇՀԱՊՁԲ-15/10-ՀՎԿԱԿ-2015-20» ծածկագրով ընթացակարգի մասնակցության հայտի թիվ 2 հավելվածով ներկայացված հայտարարությունը հանդիսանում է «Գնումների մասին» ՀՀ օրենքի 5-րդ հոդվածի 1-ին մասի 4-րդ կետի «բ» ենթակետով նախատեսված գնման գործընթացի շրջանակում կեղծ տվյալի ներկայացում:

«Գնումների մասին» ՀՀ օրենքի 5-րդ հոդվածի 1-ին մասի 4-րդ կետի «բ» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք

չունեցող մասնակիցների ցուցակում, եթե **հայտը ներկայացնելու պահին նախորդող տարվա ընթացքում գնման գործընթացի շրջանակում ներկայացրել է կեղծ տվյալ:**

Այսպիսով, Օրենքի 5-րդ հոդվածի 1-ին մասի 4-րդ կետով նախատեսված՝ գնումների գործընթացին մասնակցելու իրավունք չունեցող մասնակիցների ցուցակում մասնակցին ներառելու համար **պարտադիր և միաժամանակյա առկա հիմքերն են՝**

- նույն կետի «բ» ենթակետերով նախատեսված և մասնակցին վերագրվող խախտման առկայությունը,

- խախտումը թույլ տալու պահից մեկ տարվա ընթացքում մասնակցի կողմից մրցակցային գործընթացին մասնակցելու համար հայտ ներկայացրած լինելու հանգամանքը:

Հետևաբար, Օրենքի 5-րդ հոդվածի 1-ին մասի 4-րդ կետով նախատեսված՝ գնումների գործընթացին մասնակցելու իրավունք չունեցող մասնակիցների ցուցակում «Ոսկե Դելֆին» ՍՊԸ-ի ներառելու համար անհրաժեշտ է, որ նույն կետով սահմանված և **Ընկերությանը վերագրվող խախտում թույլ տալու պահից մեկ տարվա ընթացքում անձը մասնակցած լինի գնման որևէ գործընթացին և ներկայացրած լինի հայտ**, քանի որ օրենքի նշված նորմի համաձայն՝ մասնակիցն ընդգրկվում է նշված ցուցակում, եթե վերագրվող խախտումը կատարվել է հայտը ներկայացնելու պահին նախորդող տարվա ընթացքում:

Խորհուրդն արձանագրում է, որ «Ոսկե Դելֆին» ՍՊԸ-ի վերաբերյալ միաժամանակյա առկա են Օրենքի 5-րդ հոդվածի 1-ին մասի 4-րդ կետով նախատեսված՝ Ցուցակում ներառելու երկու հիմքերը, մասնավորապես Ընկերությունը 30.06.2015թ. մասնակցության հայտ է ներկայացրել «Երեխայի զարգացման կենտրոն» ՊՈԱԿ-ի կողմից կազմակերպված «ՀՀ ԿԱ ՈՇՀԱՊՁԲ-15/2-Ս/2015/ՄԱՆԿ-3» ծածկագրով ընթացակարգին, որի շրջանակներում ներկայացրել է կեղծ տվյալ և 07.08.2015թ. կրկին մասնակցության հայտ է ներկայացրել «Հիվանդությունների վերահսկման և կանխարգելման ազգային կենտրոն» ՊՈԱԿ-ի կողմից կազմակերպված «ՇՀԱՊՁԲ-15/10-ՀՎԿԱԿ-2015-20» ծածկագրով ընթացակարգին, որի շրջանակներում ևս թույլ է տվել Օրենքի 5-րդ հոդվածի 1-ին մասի 4-րդ կետի «բ» ենթակետի խախտում:

Կարգի 125-րդ կետի 1-ին ենթակետի համաձայն՝ Օրենքի 5-րդ հոդվածի 2-րդ մասով նախատեսված՝ գնումների բողոքարկման խորհրդի ընդունած որոշման հիման վրա մասնակիցը գնումների գործընթացին մասնակցելու իրավունք չունեցող մասնակիցների ցուցակում ընդգրկվում է՝ **6 ամիս ժամկետով**, եթե ավելի քան մեկ անգամ խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որի հետևանքով տուժանքի, հաշվարկված վնասի,՝ տույժի կամ տուգանքի չափը չի գերազանցում գնումների բազային միավորը և մինչև բողոքարկման խորհրդի կողմից համապատասխան որոշում ընդունվելը՝ պատճառված վնասը, հաշվարկված տույժը կամ տուժանքը վերականգնվել է կամ, **եթե Հայաստանի Հանրապետության պետական բյուջեի նկատմամբ հայտը ներկայացնելու օրվա դրությամբ ունեցել է ժամկետանց հարկային պարտավորություններ** կամ **որակավորման չափանիշների, իսկ ապրանքների գնման դեպքում՝ նաև տեխնիկական բնութագրերի գնահատման արդյունքում այդ որակավորման չափանիշները կամ տեխնիկական բնութագրերը որակվել են որպես մասնակցի կողմից ներկայացված հայտարարություններին չհամապատասխանող:**

Ելնելով վերոգրյալից և ղեկավարվելով «Գնումների մասին» ՀՀ օրենքի 48-րդ հոդվածի 6-րդ մասի 7-րդ կետով՝ ՀՀ գնումների բողոքարկման խորհուրդը

Ո Ր Ո Շ Ե Ց

ՀՀ ֆինանսների նախարարության 06.08.2015թ. թիվ 1/73-1/20983-15 և 01.02.2016թ. թիվ 1/73-1/2979-16 գրություններով ներկայացված «Ոսկե Դելֆին» ՍՊԸ-ին (ՀՎՀՀ՝ 00466473) ներառել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների բողոքարկման խորհրդի որոշումը կայացվելու օրվանից հաշված վեց ամիս ժամկետով:

ՀՀ գնումների բողոքարկման խորհրդի որոշումն իրավապարտադիր է:

ՀՀ գնումների բողոքարկման խորհրդի որոշումը կարող է բողոքարկվել դատական կարգով:

Բողոքը քննող հանձնաժողով՝

Նախագահ՝



Ոսկանյան Լուսինե

Անդամ՝



Մանուկյան Գրո